

Balua na bini

gba

Piele

Eli na kalanu

Piele aye nani balua na bini gba e pi omakilisito inde u a'i o li bili inde me okpala inde nani li Ebhe abhu o. Okpala ang-o atsambala nani bhú Adji Minele, ali pápá na abebe. Engú na ngbéngbé inde bhú balua inde-e, a ko nato masi bhú okpala inde ngatatanga. Padhá de, anga u adu nani ato mbolo li uo, kabula *nabhuka gba o-o. Ani aye balua ang-o ngubula naha *Bádha Ngali gba Yesu *Kilisito pi uo, inde nakpi, ne nazuku gba e ngaha pi okpala na'o 'to o 'to engú inde ani apa me ni améne e nedhinga nago ka ni ko. Nau ongu bhomu-o, uo ne kpadji koko ade, a ayo bha me u ziba nakibila olikabhu ne nambila ndjindji me, a ko nale inde u ngale uo ne e bhú nabhuka gba uo na kakulu-o. A ko la di me, u asia makalá li 'kpi inde li Yesu Kilisito ago lie (1:7).

Bhú nato masi inde li Piele ato e bhú okpala bhú nedhinga na likabhu-o, ani aha di líli pi okpala inde ngatanga balua inde me: u kobho maka okpala gba Kilisito.

Ongbengbe ongu inde bhú bhuku inde-e ngae inde:

Eli na kalanu 1:1-2

Nagama matá 'ngú ne toto pindji mukobho inde li Ebhe ngaha e 1:3-12

Líli pindji mukobho na bubu 1:13 – 2:10

Ongu inde a ayo me makilisito mene e bhú nedhinga na likabhu 2:11 – 4:19

Namene kulu ne naké li o ne kuto ka makilisito 5:1-11

Eli na soso 5:12-14

Piele yi omabhuka inde agbongbolo ne bili-e mayi

1 Ma aye balua inde-e pi yi ngama Piele, ma ne *bhulu titima gba Yesu *Kilisito . Ma aye pi yi okpala inde li Ebhe abhu o, ngayi okpala inde ngadu maka *ogandji okpala bhú kati koko, ngayi inde atsambala bhú ondu doto na Pote, ne Galatia, ne Kapadose, ne Adjia di ne Bitinia-o. ² Ebhe 'Dyi ní abhu nani yi bhutode maka ani aleke nani engú ang-o lie-o. Ani alo yi li kpadji gba *Bu Bhobua , ani a'o yi kpi ngu nadu piga gba e, ngubula me yi du namanga Yesu Kilisito, amba ngute ani vula yi ngu nadu bubu kala ni. A ayo me *badha bhú 'bu gba Ebhe-e du ne yi, amba ani ha di *guo 'ngu pi yi ane mane.

Piele adhögø Ebhe, anga ani akóbho omabhuka makobho

³ A ayo me ní dhögø Ebhe, 'Dyi Ngámá gba ní Yesu Kilisito. Padhá de, anga ani abedhe ne ndjinga pi ní bedhe, ani atsia aha mukobho na mbia pi ní bhú nazuku Yesu Kilisito bhú ká okpala inde amu-o. Kaka-a, ní abhele djila ní li ani me ní azúku di mazuku. ⁴ Ní ti la di da na'o 'to ní 'to tia inde li Ebhe awo e pi ní opiga gba e-o. Ani awo tia ang-o pi ní abhálá. Tia ang-o zizi de, a sisiti de, a pádha la di-i de. ⁵ Nganf okpala inde abhuka Ebhe-e, ani ngalila ní ne angu gba e, ngubula me ní sia mukobho na dudama ang-o. Mukobho ang-o asúno lie li sokpi.

⁶ Ka ongu ang-o, yi kpi djali, abana ayo lie me yi zu olikabhu mbia inde-e li okpadji ngangá ngu nedhinga bedi-o. ⁷ Belegu olo inde asisiti masiti-e, okpala tsutsulu ngaiza bhú djua ngu naleleke me a kolo ndjindji. A si la masi maka *nabhuka gba yi-e ane olo lie mane-e? Yi ngazu olikabhu bhomu-o ngubula me okpala mbila me a li nabhuka gba yi-e ne tata. A bhadi moko ne nabhuka gba yi-o. Ebhe améne mo-o ngu namene me, kabula

nabhuka gba yi-e, aní toko yi, aní dhøge di yi, aní mene di me 'lí yi kolo ngebéngbé lí 'kpí lí Yesu Kilisito asúno líe líe bhú *sangu gba e-o. ⁸ Belegu yi u aní líe de-e, yi ne mukúnda pí aní. Abana yi nde líe ngau aní ade-e, yi ngabhuka aní. Kaka-a, yi ngakpi djali naali, djali inde lí kpála tí da nakpokpo lele e de, ⁹ anga yi asía makalá na nabhuka gba yi-e masia. Makalá angó-o, a ko lí bua yi akóbho líe-o.

¹⁰ Nani kalanu-o, *opolofeta agílí má bhotobhoto me o mbila kpadjí lí Ebhe akóbho okpála líe-o. U adu akpokpo 'ngú kalanu pí okpála píndjí bádha bhú 'bu inde lí Ebhe a'o nani e pí yi-o. ¹¹ Bua gba Kilisito inde adu bhú uo-o apa pí uo kalanu me, Kilisito azú líkabhu. Pípíta-a, aní tsia sía sangu gba Ebhe-o. Opolofeta angó-o agílí nambíla me ongú bhomu-o akódho 'kpí nadho. U atsia agílí di nambíla me a adú lele pí. ¹² Ebhe atsia asuno pí opolofeta bhomu-o me ongú angó-o kódho 'kpí bhú nedhinga gba uo-o de, engú bini, akódho mangbo 'kpí bhú 'kpí gba yi. Mbia inde-e, okpála inde ngakpokpo *Bádha Ngali-e , akpokpo ongú bhomu-o pí yi akpokpo. U akpokpo pí yi ne angu gba Bu Bhobua inde lí Ebhe atima e-o. Belegu *oandjelu , u akúnda nau ongú angó-o.

Piele apa pí omabhuka me u du bubu kala Ebhe

¹³ Kaka-a, yi du bedhe ndu 'kpí hana. Yi bhulu djila yi, yi 'o 'to yi libhomu 'to bádha bhú 'bu inde lí Ebhe ahá e pí yi lí 'kpí lí Yesu Kilisito asúno líe líe bhú sangu gba e-o. ¹⁴ Yi manga Ebhe maka ongísí na babadha. Yi akpáta matá kpadjí na sisiti inde nani yi adu nakpata e kala me yi nde mbila Yesu Kilisito de-e de. ¹⁵ Engú bini, yi du bubu bhú mukobho gba yi-e libhomu, maka lí Ebhe inde a'i yi-e nde líe bubu-o. ¹⁶ Padhá de, anga u aye bhú *Bhuku gba Ebhe-e me: «Yi du bubu, anga ma bubu.†»

¹⁷ Nedhinga yi ngayo Ebhe líe, yi nga'i aní me «'Dyí nń». Padhá de, anga aní ngakodho 'ngú gba okpála nakpata lele kulu gba kpála ne kpála. Aní tsia la di bhúla kpála bini de. Kaka-a, nedhinga yi nde nga bha líe píla doto-o, yi manga aní bhú ndu 'ngú hana inde yi ngamene e-o. ¹⁸ Yi mbíla ndjindjí maka lí Ebhe agbegbe yi líe lí kpadjí ndu ongú hana na padhá padhá inde lí odyí yi apana e pí yi-o. Ebhe kala yi ne ehe inde ngasiti masiti maka aladja, i du di-e olo de. ¹⁹ Engú bini, aní akala yi ne ngúte Kilisito inde ane ndu 'he hana-o. Kilisito maka ndílí kandøle inde aha mukobho gba e, u atsia abhøle e-o. Aní bubu kala Ebhe, ehe na sisiti bhú aní belegu ade bini. ²⁰ Ebhe abhu nani aní ngú nakpi lí 'ngú gba okpála kala me aní bho doto, la mbia inde-e, aní atsia asuno aní bhú onedhinga na soso inde-e mbámá ngúbulu me aní kobho yi. ²¹ Kabula Kilisito-o, yi abhuka Ebhe inde azuku aní bhú ká okpála inde amu-o, aní atsia aha sangu pí aní. Kaka-a, yi nga'o nabhuka gba yi-e bhú Ebhe, yi la di nga'o 'to yi 'to aní.

²² Yi avulu bua yi avulu ngú nadu ne mukúnda na kuku lu sunda yi. Yi avulu bua yi angó-o lí kpadjí nakpata ongú na kuku lu inde lí Ebhe asuno e pí yi-o. Ka 'ngú angó-o, ma apa pí yi me, yi du ndu 'kpí hana ne mukúnda na kuku lu sunda yi di ne bádha bua. ²³ Yi mbíla ndjindjí me Ebhe aha mukobho na mbia pí yi lí kpadjí na eli gba e na dadama, inde di ngaha mukobho pí okpála-o. Ebhe inde i kpikpi de-e aha mukobho angó-o pí yi ngae makpe. Yi sia mukobho angó-o ka odyí yi inde amú mamu-o de. ²⁴ Padhá de, anga u aye bhú Bhuku gba Ebhe-e me:

«Ndu okpála hana ngamu maka ulu a'vulu líe-o.

Bádha gba kpála-kutí ngandjia maka bádha gba felele andjindjia líe,
i du me a nde anaku-o.

²⁵ Engú bini, eli gba Ngámá-a ngadu dadama ne dadama.†»

Eli angó-o, a ko Bádha Ngali inde u akpokpo e pí yi-o.

Piele apa me omabhuka du maka teme na mukobho

2 ¹ Yi bala ndu sisiti 'ngú hana kabula mukobho na mbia inde lí Ebhe aha e pí yi-o. Yi apíte kpála bini de, yi adú amene engú na kali de, yi adú ne gumu 'he gba kpála de, yi

†1:16 Tsia bhú Lev. 19:2.

†1:25 Tsia bhú Isa. 40:6-8.

adú di apa 'ngú li okpála koko sisiti de. ²Yi dɛ maka ongisi u azu o na mbia, inde ndɛ 'kpí hana ne gɛmɛ nandji 'ka. Yi dɛ bhadi ne gɛmɛ *Eli gba Ebhe-e moko ngɛbula me yi bhele, akólo li ekpí li Ebhe akóbho yi lie libhomu-o. ³Yi dɛ bha ne gɛmɛ eli ang-o na paká paká, anga yi ambila bádha 'ngú inde li Ngámá ngaha e li bua yi ambila.

⁴Yi dyudyo liyi de Ngámá Yesu *Kilisito masakpe, a ko teme na makobho, inde li okpála abhike nani e ne 'hli me a li kulu ade-o. La-a, bhú djila Ebhe inde alo nani teme ang-o, ani atsia au me a li kulu ane ndɛ oteme koko hana. ⁵Ngayi makpe-e di-e, yi dɛ maka teme inde na makobho, amba Ebhe ha yi, ani tsia yiki eti gba *Bu Bhobua ne yi maka *'ngbé 'ti Ebhe gba omaYuda-o. Bhú 'ti ang-o, yi akólo piga gba *odimandɛ inde aha lio pi Ebhe, ngɛbula naha makiso na Bu Bhobua, inde ndjindji pi Ebhe li kpadji gba Yesu Kilisito. ⁶Padhá de, anga u aye bhú *Bhuku gba Ebhe-e me:

«Yi gbo nga 'dje yi, ma alo teme bini na mase,
ma a'ó bhú gɛdhɛ na *Siona
maka teme inde abi eti-e libhomu.

Kpála inde azíba teme ang-o sía nɛmɛ belegɛ de bini.†»

⁷Pi yi okpála inde abhuka-a, teme ang-o pi yi li kulu ane ndɛ oteme koko hana. Engú bini, pi okpála bhende i bhuka de-e, a mo-o ade. Padhá de, anga u aye bhú Bhuku gba Ebhe-e me:

«Teme inde li okpála nayiki eti-e abhike e-e,
akolo teme inde abi eti-e libhomu ngae.†»

⁸U aye matá di bhú Bhuku gba Ebhe-e me:

«Okpála ngado 'dhɛ o li teme ang-o,
i tsia méne me u gɛ 'i o kuto.†»

U ngado 'dhɛ o tété, anga u ayala nakpata 'li Ebhe, Ebhe apa nani bhɛtode me a méne lie mo-o.

⁹La pi yi-e, yi ne piga inde li Ebhe abhɛ o-o. Yi ne piga gba odimandɛ inde ngamene kulu pi 'ngbé Ngámá Ebhe. Yi ne piga okpála inde li Ebhe a'o o kpi pi e. Ani abhɛ yi ngɛbula me yi kpokpo ongbengbe 'ngú inde ni amene e pi okpála. Ani a 'i yi me yi ze bhú bití, amba yi go li zi 'ke gba ni inde ngatsi ane ndɛ 'he hana-o. ¹⁰Nani kalanɛ-o, yi dɛ ne okpála gba Ebhe de, engú bini mbia inde-e, yi akolo okpála gba ani. Nani kalanɛ-o, yi sia ndjinga gba Ebhe-e de, engú bini mbia inde-e, yi asia ndjinga gba ani asia.

Piele aha líli pi omabhuka pindji lele namanga lio, di ne namanga Ebhe

¹¹*Ondaise ma na makúnda, yi mbila ndjindji me yi píla doto ei ne ogomago. Kutí gba yi-e píla doto inde-e ade. Kaka-a, ma ayo ka yi me, yi adú améne osisiti 'ngú li gɛmɛ e nde li bua yi-e de, anga ongú bhomɛ-o ngazɛ bíli li bhobua yi ngae. ¹²Yi mene ehe liyi bhú ká omɛpaganɛ ndjindji ngɛbula me, abana u dɛ apa 'ngú li yi sisiti-e, u de u obabadha 'ngú inde yi ngamene e-o, amba ekpí li Ebhe asúno lie pi uo lie, u de dhɛgɛ ani.

¹³Yi kɛ liyi ne kuto kala ndɛ okpála hana inde ngau píla doto, kabula Ngámá gba ní Yesu Kilisito inde yi ngakpata nganda e-o. Yi kɛ liyi ne kuto kala ongbengbe ongamási na doto inde ngau pí ndɛ okpála hana-o. ¹⁴Yi kɛ liyi ne kuto kala oguvelenele inde li 'ngbé ngámá a'o o-o. Ani a'o uo ngɛbula me u mene okpála inde ngamene siti 'ngú-o kpekpeke, di ne me u dhɛgɛ obhende ngamene bádha 'ngú-o. ¹⁵Padhá de, anga Ebhe akúnda me yi gbite 'bhɛ ngingi 'ngú gba okpála inde ayala nambila Ebhe-e ne namene bádha 'ngú. ¹⁶Yi mene ehe liyi maka okpála inde bhú balí ade. Engú bini, yi apá de me, o nde lie bhú balí ade-e, o mene siti 'ngú bhú gandji-e de. Yi mene mangbo liyi maka obalise gba Ebhe. ¹⁷Yi manga ndɛ okpála hana. Yi dɛ ne makúnda pi ondaise yi bhú 'bu *nabhuka. Yi manga ongbengbe ongamási namanga. Yi dhɛgɛ Ebhe.

¹⁸Ngayi obalise-e, yi kɛ liyi kala omakúlasí yi ne kuto. Yi manga uo ndjindji. Yi amánga bha bini obhende na bhukɛ 'ngú-o de, inde ngamene yi ndjindji-e de, yi manga di

†2:6 Tsia bhú Isa. 28:16.

†2:7 Tsia bhú Ets. 118:22.

†2:8 Tsia bhú Isa. 8:14.

obhende ngamene yi sisiti-o. ¹⁹ Padhá de, anga Ebhe ngasuno bádha bhú 'bu pí kpála inde ngazɛ líkabhu sakpa okpála koko padhá me aní nde mene siti 'ngú de, lí aní tsia kíbila líkabhu ango-o kabula 'lí Ebhe. ²⁰ Yi dɛ azɛ bhíkpa ka siti 'ngú yi amene e, a dhégo yi tété da? Engú bini, í dɛ me yi nde ngazɛ líkabhu sakpa okpála koko kabula bádha 'ngú inde yi amene e, lí yi kíbila líkabhu ango-o, a ko bádha 'ngú bhú djila Ebhe. ²¹ Aní a'í yi me yi mene moko, anga Kilisito azɛ bhadi líkabhu pí yi moko. Aní apana kpadjí pí yi, amba yi mene bhadi maka ní.

²² Ngaani-e, aní mene siti 'ngú de.

Aní pa eu belegɛ de bini.†

²³ Lí okpála asobho aní lie, aní gie sobho pí uo de.

Abana u ato mbolo lí aní lie, aní gɛ okpála ango-o de.

Aní a'ò mangbo lie sakpa Ebhe inde ngakodho 'ngú ngbingbili-o.

²⁴ Aní abha sisiti 'ngú gba ní-e, aní atsia abí lí kɛte e.

Aní abí siti 'ngú ango-o nedhinga u abhɛle aní lie lí kulusi ngɛbula me, ní dɛ maka okpála inde amu lí pápá na siti 'ngú amu,

dí ne me ní dɛ mangbo bhú mɛkobho inde ngbingbili.

Yi akobho ka oeka lí aní abí e-o.

²⁵ Padhá de, anga yi dɛ nani maka okandɛle inde angíta.

Engú bini, mbía inde-e, yi agie líyi agba mɛlila, inde ngalila bua yi-o.

Lele dasundɛ sɛnda olisi ne obhosi

3 ¹ Ma ngapa dí pí yi olisi moko, yi kɛ líyi kala obhosi gba yi-e ne kuto da napa me abana lí bini bini bhú ká uo bhuka 'lí Ebhe de-e, u de dji bua o ka nau lele mɛkobho gba yi, abana yi pa 'ngú pí uo píndjí *elí gba Ebhe-e de-e, ² u de bhuka kabula nau me lele dasundɛ gba yi-e ndjindjí, yi lá dí ngamanga uo. ³ Yi adú bha bini aleke kɛte yi akilidjo de, abana í dɛ bhú napulɛ sundjo yi, abana í dɛ nadyi omagege na olo, abana í dɛ dí-e bhú nadyi *obongo bhe na mase naali. ⁴ Engú bini, yi leke mangbo líyi bhú naleke bua yi. Yi kɛ líyi ne kuto, yi dɛ dí ne *guo 'ngú . Padhá de, anga a bhomɛ-o bádha bhe í zizi de-o, a nganga lí Ebhe naali. ⁵ Olisi na kalanɛ inde adɛ akpata Ebhe-e, inde adɛ dí na'ò 'to o 'to ani-e, adɛ nani aleke lío ne ngua bádha kulu bhomɛ. U adɛ lá dí namene lílí gba obhosi gba o-o. ⁶ Yi bhundja nga píndjí Sala. Aní adɛ amene nani lílí gba 'ko e Abalahama ndjindjí. Aní adɛ a'í aní me ngámá gba ní. Yi ne ongisi na olisilisi gba Sala na paká paká, í dɛ me yi nde ngamene bádha 'ngú, yi nde 'o lá dí de me tsulɛ ha angu yi de-o.

⁷ A bhadi moko pí yi obhosi, a ayo me dasundɛ gba yi ne olisi gba yi-e dɛ ndjindjí. Yi mbíla ndjindjí me uo bhɛbhɛkɛ ane yi. Yi manga uo mamanga, anga mɛkobho inde lí Ebhe ahá e pí yi bhú bádha bhú 'bu gba e-e, aní ahá pí ndɛ yi ne uo hana. Yi mene mo-o, ehe bini ní kpadjí kala mayo gba yi-e de.

Lele dasundɛ gba omabhuka

⁸ Ngú nabu tata-a, yi dɛ ndɛ yi hana ne bua bini, yi dɛ amene bádha 'ngú lí yi sɛnda yi, yi dɛ ne mɛkɛnda sɛnda yi maka *ondaise . Yi dɛ ne ndjinga sɛnda yi, yi kɛ lá dí líyi sɛnda yi ne kuto. ⁹ Yi agíe siti pí siti de, í dɛ dí-e sobho pí sobho de. Lí kpála sobho yi-e, yi agíe sobho pí aní de, engú bini, yi yo mangbo Ebhe me aní tuko bisagu pí aní. Padhá de, anga nedhinga lí Ebhe a'í yi lie me yi dɛ píga gba ní-e, aní apa nani pí yi me ní atúko bisagu pí yi. ¹⁰ A maka u aye lie bhú *Bhuku gba Ebhe-e me:

«Lí kpála kɛnda me mɛkobho gba ní-e dɛ ndjindjí-e,

aní kɛnda lá dí me ní dɛ bhú djali-e,

a ayo de me aní dɛ apa siti 'ngú-o de,

a ayo lá dí de me aní dɛ apa eu-o de.

¹¹ A ayo me aní dji 'ngbu e lí siti 'ngú,

†2:22 Tsia bhú tsa. 53:9.

ani mene mangbo bádha 'ngú.

Ani gili guo 'ngú ne kekele hana.

¹² Padhá de, anga Ngámá ne djila e li okpála inde ngamene *ngbili 'ngú ,
ani bedhe ngú nadje mayo gba uo.

Engú bini, ani ngadji 'ngbú e li okpála bhende ngamene osisiti 'ngú-o.†»

Piele apa me omabhuka kibila likabhu me u nde ngamene bádha 'ngú

¹³ I dū me yi nde nga'o bua yi hana li namene bádha 'ngú-o, a ko da inde améne yi sisiti-e? ¹⁴ Yi dū ne djali nedhinga yi ngazū likabhu lie ka bádha 'ngú inde yi ngamene e-o. Ka 'ngú ang-o, yi adū ne tsūlū okpála inde ngakūnda namene yi sisiti-e de, bua yi abáka di-i de. ¹⁵ Yi dhögø mangbo *Kilisito li bua yi maka Ngámá gba yi. Yi dū bedhe ndū 'kpí hana ngú nakpokpo 'ta yi nga'o 'to yi lie 'to Kilisito pí okpála bhende ngayi yi tété-o. ¹⁶ Engú bini, yi kpokpo ne bhūkū bua, amba yi manga la di uo mamanga. Yi mene ndū 'kpí hana engú inde yi au e li bua yi me a ndjindji-o, amba okpála bhende ngapa 'ngú li yi sisiti-e, sia nūmū nedhinga u ngasobho bádha kulu yi ngamene e kabula 'li Kilisito lie-o. ¹⁷ Padhá de, anga yi sia likabhu kabula bádha 'ngú inde yi ngamene e, engú tété ade. La-a, yi sia likabhu kabula bádha 'ngú inde yi ngamene e, i dū me Ebhe nde azíba mo-o, bhobhomū-o ane ne bádha ngae.

¹⁸ Padhá de, anga Kilisito adje di likabhu kabula siti 'ngú gba ní-e bhətsibhətsi bini má ngbi! Ngaani kpála inde i mene siti 'ngú de-e, ani akpi ngūbula *nakobho ní okpála inde ngamene siti 'ngú-o, ngūbula me ani mba bhūla ní agba Ebhe. Okpála abhəle ani bhū kəte, engú bini Ebhe atsia azuku ani li kpadji gba *Bu Bhobua .

¹⁹ Ka angu gba Bu Bhobua bhomū-o, ani atsia anū belegū di nakpokpo *Bádha Ngali gba Ebhe-e pí obua inde amu inde bhū tikpū-o. ²⁰ A ko bua okpála inde ayala nani ndji bua o nedhinga li Nūa adū abho 'ngbé zabū lie-o. La-a, Ebhe adjeke nani uo ne 'ndjá bua. Okpála inde li engu-o akobho nani o-o, u dū bhelé de. A adū bha nani okpála madjina padhá inde a'w'w nani bhū zabū-o. ²¹ Engu bhomū-o, a ko kulu batisimo. Ebhe ngakobho yi mbia inde-e li kpadji na batisimo bhomū. Batisimo ang-o ngūbula na'e zibotū na kəte ade, engú bini, a ngūbula naha lío libhomu pí Ebhe ne bua nambila ngbili 'ngú. Ebhe ngakobho yi li kpadji na batisimo ang-o ka li Yesu Kilisito azuku lie-o. ²² Ani atapa abhúalá, ani adū de Ebhe li pápá na kokpa. Ani ngau pí 'ndji *oandjelu di ne pí 'ndji ndū obua hana inde ne angu abhúalá oo-o.

A ayo me omabhuka mene engú li lele mukobho na mbia

4 ¹ Ní mbila ndjindji me *Kilisito adje likabhu bhū kəte. Kaka-a, ngayi di-e, yi dū bedhe ngú likabhu maka ani. Padhá de, anga kpála inde adje likabhu bhū kəte-e, a'o namene siti 'ngú a'o. ² Nayie pí mbia inde-e, nedhinga hana inde yi améne e píla doto-o, a ayo me yi mene bhū mukobho gba yi-e engú inde li Ebhe akūnda e-o. Yi améne engú na sisiti inde li bua yi ngakūnda e de. ³ Padhá de, anga yi abala nako nedhinga gba yi-e bhelé bhū namene engú li omūpagano amemene e-o. Yi améne matá mo-o de. Yi adū nani akūnda olisi di ne obhosi ngangá, gūmū kəte aha di nani angu yi maha. Yi adū abhəle kuo yi ne pandí, yi adū apo bhūla yi ngú nandji pandí, yi adū adho 'bí na sisiti. Yi adū di amene engú inde ayo la ndjū nako de me yi mene e de-o, anga yi adū adhögø oebhe na eu.

⁴ La mbia inde-e, omūpagano ngangamba, u la di ngasobho yi, anga yi kə matá nganda uo bhū siti 'ngú inde u ngamene e na mūgwe mūgwe-e de. ⁵ Engú bini, ekpí akólo makolo. Li 'kpí ang-o, u akpóko 'ngú gba o-o kala Ebhe inde bedhe ngú nakodho 'ngú gba okpála inde ũ, di ne okpála bhende amu-o. ⁶ Ka 'ngú ang-o, Kilisito anū nani belegū nakpokpo *Bádha Ngali pí okpála inde amu-o. Ani akpokpo pí uo ngūbula me, maka li Ebhe akodho 'ngú gba okpála hana lie, ngauo di-e, Ebhe akódho 'ngú gba uo-o nakpata

lele maka u adu nani lie pfla doto, amba u du bhú mukobho maka Ebhe li kpadji gba *Bu Bhobua .

Piele apa me omabhuka mene kulu ne makalá u asia e ka Ebhe-o

⁷ Sokpí akolo masikpe. Kaka-a, yi du ne bádha mabhundja, yi bhulu djila yi, amba yi du nayo Ebhe. ⁸ Kala ndu 'ngú hana-a, yi du ne mukúnda na paká paká sunda yi, anga bhobhomu-o méne me yi mbu li bhiti osisiti 'ngú li okpála koko ngamene e-o. ⁹ Yi sia okpála inde ngago agba yi-e ndjindji. Yi asia uo ne nadi matokono de. ¹⁰ A ayo me yi teteke liyi ne makalá inde li Ebhe aha e pi yi bhú bádha bhú 'bu gba e-o. Yi mene mo-o, yi dú maka obabadha okpála inde ambila namene kulu ne makalá li Ebhe aha e pi yi kpi kpi kpi-o. ¹¹ A ayo me kpála inde asia makalá nagama 'ngú-o, kpokpo *oeli gba Ebhe-o . A ayo me kpála inde asia makalá namene kulu pi okpála koko-o, mene ne angu li Ebhe aha e pi ani-e hana, amba bhú ndu 'ngú hana-a, okpála dhөгө Ebhe ka Yesu Kilisito. Padhá de, anga ndu okpála hana ngadhөгө Ebhe, ndu angu hana sakpa ani dudu ma ne dudu ma. A adu moko!

Piele apa me omabhuka kibila likabhu ka 'li Kilisito

¹² *Ondaise ma na mukúnda, yi angamba ka okpekpeke da 'ngú yi ngali bhú e de. Ongú bhomu-o ngakolo li yi ngubula nambila lele *nabhuka gba yi-e nde lie-o. Yi abhúndja de me a ko ongú koko kpi-e de. ¹³ Engú bini, yi kpi djali, anga yi ngabi bhomu-o té likabhu inde li Kilisito adje e, amba li 'kpí ani asúno *sangu gba e lie pi ndu okpála hana-a, yi de bedhe di ne djali na kuo kuo. ¹⁴ Yi du ne djali nedhinga li okpála nde ngasobho yi lie kabula 'li Kilisito-o. Padhá de, anga Bua na asasaua gba Ebhe-e ngadu bhú dabilí bini ne yi. ¹⁵ I du me saka yi nde ngazu likabhu-o, adú de me ani amene siti 'ngú-o de. A ayo di de me ani zu likabhu anga ani abhelo kpála de, ne me ani azi 'he-e de, i du di-e me ani ali bhú 'ngú gba kpála koko-o de. ¹⁶ Engú bini, i du me kpála nde ngadje likabhu anga a ko makilisito-o, a ayo de me ani dje namu tété-e de. Ani gie mangbo heni pi Ebhe, anga a ko kpála ka Kilisito.

¹⁷ Nedhinga akolo, nedhinga inde li Ebhe akódho 'ngú gba okpála lie-o. Yi mbila la me, ani akpó lita nakodho 'ngú angu-o li okpála gba e makpe. I du la mo-o, bhende gba okpála inde ngayala naziba Bádha Ngali gba Ebhe-e adú la ibili naae lele pi? ¹⁸ U aye bhú *Bhuku gba Ebhe-e me:

«I du me da *nakobho ka okpála inde ngbingbili-e nde kpekpeke-e,
engú bhe gba okpála inde ngayala Ebhe, inde la di ngamene siti 'ngú-o,
adú la ibili lele pi?»

¹⁹ Kaka-a, okpála bhende ngadje likabhu anga Ebhe aziba mo-o, nu ne namene bádha 'ngú ne kalanu. U 'o la di lio makpe sakpa kpála inde abho ní, inde amemene 'ngú maka ani apa lie-o.

A ayo nalila okandole gba Ebhe-e malila

5 ¹ Ma ngagama 'ngú mbia inde-e pi okpála bhende bhú ká yi ne *obhelesi okpála na Piga gba Ebhe-o . Ma di ne bhele kpála na Dadjua gba Ebhe maka uo. Ma au likabhu li *Kilisito azu e ne djila ma. Ma asia la di té *sangu gba Kilisito inde li Ebhe asúno e pi ní-o. Kaka-a, ma ngayo ka yi me: ² yi lila okpála inde li Ebhe a'o o sakpa yi-e malila. Yi lila uo maka li kpála nalila okandole alilila okandole gba e lie-o. Yi alíla uo ka napa de me u agbite yi tété ne kpeke-e de. Engú bini, yi lila uo ne bádha bua maka li Ebhe akúnda lie-o. Yi améne kulu ngubula nasia tia de, engú bini yi mene me yi nde abedhe ne mukúnda bedhe. ³ Yi alíla okpála li Ebhe a'o o sakpa yi-e de me yi nde ako angu yi pí uo mako-o de. Engú bini, yi mene me okpála kpata lele dasundu gba yi-o. ⁴ Li yi mene mo-o,

†4:18 Tsia bhú Gbt. 11:31.

ekpí li Yesu Kilisito inde ngalila ní-e agó lie-e, yi sía makalá na sangu ka ani. Makalá ango-o ngadu duduama ne duduama.

Yi kə liyi kala Ebhe ne kuto

⁵ A bhadi moko pi yi omakombise, yi kə liyi ne kuto kala obhelesi okpála gba yi-o. Ma ngapa pi ndu yi *omabhuka hana me, yi kə liyi ne kuto sūnda yi. Yi teteke liyi sūnda yi, padhá de, anga u aye bhú *Bhuku gba Ebhe-e me:

«Ebhe ngadji 'ngbu e li obhulu 'ngbé 'ndji,

engú bini, ani ngaha bádha bhú 'bu pi okpála inde ngaké lio ne kuto.†»

⁶ Kaka-a, ma ngapa pi yi me yi kə liyi ne kuto kala Ebhe inde ne angu, amba ani 'e'e yi ne abhúlá li nedhinga ani akúnda lie-o. ⁷ Yi 'o ndu 'ngú hana inde ngato mbolo li yi-e sakpa ani, anga ani ngalila yi.

⁸ Yi du bedhe, yi lila liyi, padhá de, anga djabulu bhulu yala gba ní-e ngadji bili maka kingbi inde ngangulumba. Ani ngagili me ni azú da-ie. ⁹ Yi lu kala ani kpekpeke bhú *nabhuka . Yi mbila ndjindji me omabhuka koko pila doto libhomu-o bhadi ngadje likabhu maka yi. ¹⁰ Yi adjé nga matá likabhu ngubula nedhinga bedi. Engú bini, Ebhe inde bhulu bádha bhú 'bu-o, a'i yi ngú nali bhú sangu na duduama gba e bhú nakpotsə liyi bhú dabili ne Kilisito. Ani aléke yi ngae makpe, ani tsia méne me yi lu kpekpeke bhú ndu 'ngú hana má kpəkəbhə! ¹¹ A ayo me ani u duduama ne duduama. A adu moko.

Oeli na soso

¹² Silivano ateteke ma li naye mbo ndu balua inde-e pi yi ngae. Ma ambila me a ko *ndai ní makilisito inde ngamene 'ngú li lelele. Ma aye balua inde-e ngubula nato masi bhú yi, di ne napa pi yi me a inde-e bádha bhú 'bu na kaku lu gba Ebhe, yi gbite liyi tété.

¹³ Omabhuka inde bhú Babilona^a ei, inde li Ebhe abhu o maka ani abhu di yi lie-e, yi yi mayi. Ndili gba ma Maloko yi di yi mayi. ¹⁴ Yi yi liyi sūnda yi, yi kama liyi sūnda yi ngú nasuno me yi ne mukúnda sūnda yi. A ayo me *guo 'ngú du bhú dabili bini ne yi okpála inde bhú 'bu Kilisito hana.

^a5:13 Babilona: Okpála bhelé ngabhundja me li bili inde-e, a akúnda nasuno gudhu na *Loma .

†5:5 Tsia bhú Gbt. 3:34.